



## EDITORIAL

### Urusahon an nagkukuri nga katawhan kontra ha terorismo han estado ngan imperyalismo nga US

**H**A ATUBANGAN HAN MGA BULADAS NI GLORIA MACAPAGAL-ARROYO para ha “makusog ngan madig-on nga republika” ngan para ha todo-todo nga gerra, andam an rebolusyonaryo nga kagiusan ngan katawhan Pilipino nga sumulong agud tapuson an iya rehimen. Sugad hi Macapagal-Arroyo hin usa nga reyna han mga anay nga hitaas an pagkita ha kalugaringon ha luyo han nadudunot nga sistema nga gintutungtungan hini.

#### HINI NGA ISYU:

- Kasundaluhan,  
gin-ambus han BHB..... p. 3
- Urog nga ginpapakurian an  
katawhan han rehimen nga  
Macapagal-Arroyo..... p. 6
- “Gerra kontra ha terorismo”:  
Gerra kontra ha katawhan  
ngan rebolusyon Pilipino..... p. 9

Tikang han iya Pamulong ha Kamutangan han Nasud (SONA) hadton Hulyo 22, bug-os nga katuyawan nga iginpipirit ni Macapagal-Arroyo ha katawhan an mga huyob nga labaw nga pasista, maka-imperyalista ngan magpapabilin ha iya ha poder. Ini an ubod han iya panawagan para ha usa nga “makusog ngan madig-on nga republika”. Pagbirikis la han kamatuoran an SONA ni Macapagal-Arroyo ha pagtagad komo mga “kadaugan” an pankatilingban nga rigumok ngan mas grabe nga paghihimakuri han

...tikang ha paypay 1

katawhan nga resulta han imperyalista nga “globalisasyon”.

Urog nga nakikita han mga parag-uma an buwa nga kinaiya han reporma nga agraryo dida ha pagrehistro han rehimen han pinakahabubo nga rekord ha kasaysayan han tuna nga naipanhatag. Pinakahitaas liwat ha kasaysayan an presente nga rekord han kawaray trabaho. Mas nagtitikagrabe an kakurian ha nasud resulta han tikagrabe nga krisis sosyo-ekonomiko. Nahahangrit bisan an mga namumutnga an saray ha katilingban ha pagbagsak han ira panginabuhin ngan ha dugang nga pakuri han waray-hunong nga paghitaas han sukot ha kuryente, tubig ngan lana.

Diri urusahon o bag-o an pagsalawad ni Macapagal-Arroyo han konsepto nga “makusog ngan madig-on nga republika” ha iya SONA. Panigamnan ini diri han gahum kundi han pagkaniyutiyo ha imperyalismo nga US ha kulaos “gerra ha terorismo”. Nangangahulugan ini han kontra-rebolusyonaryo ngan kontra-katawhan nga kabangisan agud makagpadayon an lokal ngan langyaw nga paniniyupi ha ilarum han imperyalista nga “globalisasyon”.

Han naglabay pa nga tuig nga ginhawanan han rehimen Macapagal-Arroyo an dalan para ha direkta nga armado nga panginginlabot han US para poypuyon an rebolusyon Pilipino ngan panalipdan an istrategiko nga interes han imperyalismo nga US. Nagtikang an lohikal nga daloy han mga panhitabo dida han pagbisita ni Macapagal-Arroyo ha US han nag-agi nga tuig para kumarawat han mga mando. Kahuman hini naglansar hin serye hin tinagdagko nga ehersisyo militar (Balikatan), kadungan han dugang nga ayuda militar ha AFP. Nagbug-os liwat hin mga bag-o nga kasarabutan militar giutan han US ngan Pilipinas sugad han Mutwal nga Kasarabutan ha Lohistika ngan Suplay (MLSA). Hini nga Agosto 5, nanawagan na hi Macapagal-Arroyo hin gerra kontra ha rebolusyonaryo nga kagiusan nga gintudlok niya ngan han US komo “terorista”.

Ha pagtuyang han US, andam kumapyot ha tarum han pasismo an rehimen nga Macapagal-Arroyo agud makagpabilin ha poder, makaungbaw ha nagbabanggaay nga mga paksyon han naghahadi nga klase, ngan urog nga pakurian ngan raugdaugon an katawhan. Ha luyo nga bahin, mas nagtitikaklaro ha katawhan kun hin-o an mga tinuod nga “terorista”. Dugang nga nadig-on an makanasud ngan anti-imperyalista nga panindugan han katawhan Pilipino

para ha gerra han katawhan. Ayat han panahon ha rebolusyonaryo nga kagiusan nga dugang nga isulong an armado nga pakig-away ngan kagiusan masa para tapuson an terorismo han estado ngan imperyalismo nga US.

Parayhakon an mga taktikal nga opensiba kontra ha pasista ngan imperyalista nga pananarhug! Waray bisan ano nga hulga han haytek nga pakiggerra han imperyalismo nga US an makakaperdi ha ginerilya nga pakiggerra nga mas naghahaluag ngan nagigin sik-on ha suporta han katawhan. Kinahanglan dugang nga isulong an armado nga pakig-away ha butnga han mapaso nga patriyotiko nga suporta han



**AYAT HAN PANAHOON HA  
REBOLUSYONARYO NGA  
KAGIUSAN NGA DUGANG NGA  
ISULONG AN ARMADO NGA  
PAKIG-AWAY NGAN KAGIUSAN  
MASA PARA TAPUSON AN  
TERORISMO HAN ESTADO NGAN  
IMPERYALISMO NGA US.**

katawhan Pilipino. Maghahatag hin dugsang an iba-iba nga tipo hin operasyon ha pwersa militar ngan pan-ekonomiya nga interes han niyutiyo nga rehimen ngan imperyalismo nga US.

Pandayon an pagkaurusa han katawhan ha ngatanan nga balitang ngan hul-os nga ihimulag an rehimen nga Macapagal-Arroyo! Maupay an sitwasyon para mapadig-on an iba-iba nga tipo ngan porma han pagkaurusa han katawhan ngan mabug-os an pinakahalapad nga ranggo agud mahimulag an rehimen nga Macapagal-Arroyo. Kinahanglan an dugang nga paningkamot nga magtukod hin pinakadamo nga taktikal nga alyansa para ha iba-iba nga katuyuanan ngan para mabungkag ha ultimo an ranggo han naghahadi nga rehimen. An direkta ngan diri-direkta nga suporta para ha armado nga pakig-away an tukma nga direksyon hini nga mga paningkamot.

Isulong an mga pakig-away nga kontrapyudal, kontrapasista ngan anti-imperyalista! Kinahanglan pukawon, organisahon ngan pagiuson an katawhan ha iba-iba nga isyu nga nasudnon ngan lokal. Makatadungan an pag-ato han katawhan para ha ira mga katungod ngan para ha kaupayan nga makakabot para makalahutay ha grabe nga krisis. Kinahanglan masantop han katawhan an kalugaringon nira nga kusog ngan an paglaum ha kabubwason aada ha duruyog nga paggios ha balayan han nasudnon demokratiko nga rebolusyon. ▲

## PANHITABO NGAN HUYOB



### Kasundaluhan, gin-ambus han BHB

**P**INAN-NGALASAN NGAN WARAY MAKATato an mga elemento han 34<sup>th</sup> IB nga gin-ambus han BHB hadton udto han Hunyo 30, giutan han Brgy. Concepcion ngan Brgy. Lawaan ha Paranas, Weste Samar. Duha nga sundalo an patay ngan upat an samaran. Nakumpiska han mga kasama an ngatanan nga armas han kasundaluhan.

Samtang, naisumat nga usa nga CAFGU an namatay han Hulyo 22 ha agway giutan han BHB ngan mga elemento han 803<sup>rd</sup> Army Brigade ha Matuguinao, Weste Samar. Ginkilala an CAFGU nga hi Rodolfo Rapizza. Waray naisumat nga kaswalti ha mga kasama. ▲

### Adlaw han Pagkasangkay han US ngan Pilipinas, gintigamnan pinaagi hin gios-protesta

**G**INTIGAMNAN HAN YUKOT-YUKOT NGA katawhan an Hulyo 4, Adlaw han Pagkasangkay han US ngan Pilipinas, pinaagi hin pagkondenar ha tikagrabeng armado nga pangngilabot han US ha Pilipinas. Han Hulyo 3, nagkaada hin *caravan* hin maabot 30 nga sarkyan han mga delegado tikang ha Samar ngan Leyte. Maabot 3,000 nga katawhan an nagmartsa dara an mga sulo ha Tacloban han gab-i. Han Hulyo 4, nagmartsa-rali an maabot 5,000 nga katawhan. Ginpangunahan an rali han mga progresibo nga organisasyon ngan alyansa sugad han Bayan, Bayan Muna, Anakbayan, Sagupa, SIBAT (Sinirangan Bisayas Alyansa Kontra Tropa-Amerikano), ALIS (Alyansa Laban sa Imperyalismong US), ngan KONTRA (Kabataan Kontra Balikatan). Sering han usa nga maslider ha iya pamulong, “An pagpapaka-niyutiyo han rehimen Macapagal-Arroyo ha imperyalismo nga US in magbubutang ha iya ha peligro; mahihimulag hiya ha katawhan ngan masingadto hiya hin pagbagsak.” ▲

### Yukot-yukot nga katawhan, nagmartsa kontra ha SONA

**H**A PAGHATAG NI MACAPAGAL-ARROYO han Pahayag ha Kamutangan han Nasud (SONA), nagmartsa ngadto ha Kongreso han Hulyo 22 an pira kanapulo kayukot nga katawhan para ipanawagan an ira mga araba ngan ibuksas an tinuod nga kamutangan han nasud. Naglansar liwat hin mga gios protesta ha mga sentro nga syudad han Baguio, Naga, Legazpi, Bacolod, Dumaguete, Cebu, Tagbilaran, Tacloban, Cagayan de Oro, General Santos ngan Davao. ▲

### Mga rebisyunista nga traydor, ginreyd han BHB

**G**IN-ATAKE HAN BHB AN WALO KATAWO nga grupo han bandido nga “Rebolusyonaryong Hukbong Bayan” (RHB) han Hunyo 29 ha Brgy. Taliptip, Bulacan, Bulacan. Napatay an duha upod an lider han grupo, samtang an iba in samaran ngan sumurunder. Nakumpiska ha nasabi nga opensiba an lima nga higtaas an kalibre nga armas, duha nga baloto ngan iba pa nga higamit militar.

Samtang, madinaugon nga ginreyd han Hulyo 22 han usa ka platoon han BHB an usa nga balay nga base han traydor nga “Revolutionary Proletarian Army” (RPA) ha Sityo Maganay, Brgy. Bi-ao, Binalbagan, Negros Occidental. Waray makaato an nasorpresa nga 14 nga kaapihan han RPA ngan nakumpiska ha ira an unom nga M16, usa nga M14, usa nga M203, usa nga garan, usa nga karbin, mga pistola, yukot-yukot nga bala, ngan usa nga *cellphone*. ▲

### Anti-imperyalista nga mga protesta ha langyaw nga labnasan

**H**UGOT NGA GINKONDENA HAN 10,000 nga katawhan ha kakalsadahan han Oslo, Norway han Hunyo 25 an iba-iba nga kahimo han pankalibutan nga kapitalismo ha okasyon han miting han World Bank. Samtang, yukot-yukot nga katawhan an nagpahayag hin anti-imperyalista nga protesta ha miting han Group of 8 (G8) ha Canada. An G8 in usa nga poderuso nga imperyalista nga grupo han mga nasud nga US, Japan, Pransya, Gran Britanya, Alemanya, Canada, Italya ngan Rusya. ▲

## HR MONITOR

## Klima han pananarhug ha Leyte

**T**UNGOD HAN IRA MAKATADUNGAN NGA PAGPOSISYON HA KATUNAAN han dagko nga mga agaron ha Leyte, mayda klima han pananarhug kontra ha mga kaapi han mga asosasyon han parag-uma ha San Isidro ngan Calubian, Leyte. Pauro-utro hini nga Enero, Marso, Mayo, Hunyo ngan Hulyo an mga kaso hin pag-atentar hin pagpatay ngan harasment han *goons* han mga agaron maytuna ngan mga kakunsabo nira nga pulis.

Han Hulyo 7, ginparakrakan hin bala han usa nga nagngangaran kan Joel Remota, tawohan han Asyenda Balmoria, an mga kaapi han Asosasyon han mga Parag-uma ha Cabunga-an (CFA) ha Cabunga-an, San Isidro, Leyte. Gamit an usa nga Ingram nga armas, nangawat liwat ini hiya hin mais hadto. Pag-abot han Hulyo 16, ginsunog an balay ni Julito Yurag, tsirman han CFA; gintatantiya nga P16,000 an balor han mga nadestroso nga pananag-iyá, upod an pondo nga mais han organisasyon. Hadto pa liwat gintarhug han mga goons ngan mga tawohan han RMG [pulisya] nga papatayon hi Yurag. Han Hulyo 28, inulpot an grupo nga ginpanguluhan ni Cedric Balmoria nga armado hin lima nga higtaas nga kalibre nga pusil ngan tulo nga pistola. Pira kabeses hira nga waray pag-aalang nga nagpinarakrak hin bala tikang alas 6 ngada alas 10 han gab-i. Nagpatrolya liwat hira para pugngan an mga parag-uma nga makagtrabaho ha ira umhanan. Mag-aga hira nga ginbantayan han mga taga-CFA para maatuhan an mga kadugangan nga destroso.

Didto naman ha Taglawigan, San Isidro, Leyte, ginkawat han Hulyo 19 an karabaw nira Bencio ngan Gina Palapar nga may balor nga P15,000. Nahibaruan nira Palapar ngan mga kaapi han Asosasyon han mga Parag-uma ha Taglawigan (TFA) nga mga *goons* han pamilya nga Larrazabal ngan duha nga kaapi han RMG an nangawat ngan nagpatay han karabaw.

Samtang nakasakay ha habal-habal para ha paghakot hin kopra, gintutukan hin pusil hi Reynaldo Barlosa, kaapi han asosasyon han



parag-uma, han mga *goons* han grupo nga MAIC han Hulyo 24. Pag-abot han Hulyo 26, samtang nagtatrabaho hira ha komunal nga umhanan ha Brgy. Crossing, gin-istraping ha sakob hin 30 minutos an mga kaapi han mga asosasyon han parag-uma tikang ha Paghanguan, Kapinyahan, ngan Crossing, San Isidro, Leyte. Ginkilala an mga naghimo hini nga mga tawohan ni Lito Osmena ngan han grupo nga MAIC ngan Nanding (pareho nga mga tinapuran han mga despotiko nga agaron maytuna). Armado hira hin M203, M16, karbin, syatgan, ngan pistola.

Dugang nga nagdidig-on an militante nga pagkaurusa ngan paggios han mga parag-uma para buuong an klima han pananarhug han mga agaron maytuna ngan pasista nga rehimen. ▲

HA KAMATUORAN

An ngatanan para ha usa,  
An usa para ha ngatanan

**S**OBRA TUIG NA AN NAGLABAY, GINLILINANAT PA GIHAPON HI HEN. ROMEO Dominguez, CO han 8<sup>th</sup> ID PA, han multo han iskandalo ha Lamitan, Basilan. Mahinunumduman nga gin-akusaran ini hi Dominguez hin pagkarawat hin pira ka milyon tikang ha Abu Sayyaf kabalyo han pagpaiskapo han mga bandido hadton Hunyo 2, 2001. Subay han testimonya ni Fr. Nacorda, an padi ha Lamitan, ginbahin-bahinan han mga upisyal han militar, Abu Sayyaf, ngan lokal nga upisyal han gubyrno an maabot P27 milyon nga ransom nga ginbayad han pamilya han pira nga hosteyds han Abu Sayyaf.

Ginrekomenda han Senado hini nga Agosto nga bistahon ha *general court-martial* (korte-militar para ha heneral) hi Dominguez upod an usa nga koronel ngan usa nga major han AFP. Kundi han Agosto 19, pira kaadlaw la kahuman gumawas an rekomendasyon han Senado, gin-anunsyo dayon han AFP nga napamatud-an nga waray sala hi Dominguez! Ini ha luyo hin 1,500 kapaypay nga dokumento ngan testimonya han sobra 50 nga testigo, nga nagtutudlok nga nakigkunsabo hi Dominguez ha Abu Sayyaf. Tungod ha suspetsa han kadam-an nga ginpapanalipdan han AFP hi Dominguez, napiritan nga magpahayag an Senado ngan AFP nga utro abrihan an kaso.

Desperado an AFP nga matahuban an seryoso nga baratunon ni Dominguez. Tungod ini kay nahahadlok an rehimen Macapagal-Arroyo nga mabuksas nga angay liwat papagbatunon pati ngay-an hira Hen. Angelo Reyes, sekretaryo han nasudnon nga depensa, ngan hi Hen. Diomedo Villanueva, anay hepe han AFP.

An napapamatud-an lugod hin waray-duda amo nga buhi-buhian ha sakob han AFP an prinsipyo han “ngatanan para ha usa, usa para ha ngatanan”. Saho man kun magin sugad-sugad hin pambala nala ha kanyon an mga ordinaryo nga sundalo. Ngan saho man kun an haluag nga masa an naaagrabyado han destroso ngan pangangabuso. Ginpapakita la hini nga waray baratunon an AFP labot ha iya kalugaringon! ▲



## PANAN-AW



## Urog nga ginpapakurian an katawhan han rehimen nga Macapagal-Arroyo

**H**A IYA PAMULONG HA KAMUTANGAN HAN NASUD (SONA) HADIN HULYO 22, iginbandilyo ni Macapagal-Arroyo nga nagin madinaugon hiya ha pagsolbar ha imedyet nga mga krisis tikadto ha pagtutukod hin usa nga “makusog ngan madig-on nga republika”. Ha pagkita naman han katawhan, buaw niya nga iginhihinambog komo mga “kadaugan” an paghikaw han gubyerno han mga serbisyo pankatilingban, han padayon nga pasista nga kabangisan han estado, ngan han dugang nga kahiludlod han katawhan ha kakurian.

### Kamutangan ha ekonomiya

Ginhinambog ni Macapagal-Arroyo ha reporma nga agraryo nga naipanhatag na an 250,000 ektarya. Kundi buwa la ini, tungod kay mismo ha ika-14 nga anibersaryo han programa nga CARP han Hunyo 10, gumawas nga an tinuod nga ihap han Iginhatag nga Sertipiko ha Pananag-iya ha Tuna (CLOA) nga naipanhatag han gubyerno han nag-agi nga tuig (may lupgop nga 104,261 ektarya) an pinakahamubo ha kasaysayan han CARP. Ha Sinirangan Bisayas, gin-amkon han Sekretaryo ha Reporma nga Agraryo nga hi Hernani Braganza hadin Mayo nga 56 CLOA (may lupgop nga 173 ektarya) pala an naipanhatag yana nga tuig – hirayo ura-ura ha target nga 40,000 ektarya yana nga 2002 o ha kabugosan nga target ha rehiyon nga 80,000 ektarya.

Ha natad han pagtrabaho, pinakahitaas na ha kasaysayan an presente nga porsyento han waray trabaho (13.9%). Kun idugang dinhi an 5 milyon nga kulang hin trabaho ngan 8 milyon nga nagpapakabuhi ha gawas han nasud (ha rason nga waray pakabuhi dinhi), nagawas nga 42% ha kabugusan nga kusog pagtrabaho an diri nakakagpakabuhi hin sadang. Ha Rehiyon 8, gintatantiya nga 7.8% na an waray trabaho ngan 14.5% na an kulang hin trabaho hadton Oktubre 2000.

Ginpapasugbong liwat ni Macapagal-Arroyo ha katawhan an mga kadugangan nga kabaraydan ngan waray-hunong nga pag-umento han sukot ha kuryente, tubig ngan lana. Nagigin eksplosibo bisan

...tikang ha paypay 6

ha mga namumutnga an saray an mga surugbungon nga diri-makatadungan nga kabaraydan nga PPA ha kuryente ngan panhuhuthot hin tinagdagko nga ganansya han mga kumpanya ha lana.

Subay liwat ha upisyal nga sumat, 16.5 milyon nga Pilipino an nakaturog hin gutom kada adlaw. Gintudlok liwat an Sinirangan Bisayas hadton Hunyo han Nasudnon nga Komisyon ha Nutrisyon han gubyrno komo ikaduha ha bug-os nga nasud ha ihap han pinakadamo nga kabataan nga kulang hin sadang nga pagkaon (36.3% o 227,442 nga mga bata).

### Kamutangan ha pulitika


Tikang han mahingada ha poder kahuman han EDSA II, waray pag-aalang nga ginpatuman ni Macapagal-Arroyo an terorismo han estado ngan nanawagan pa para ha terorismo han imperyalismo nga US. Nababaraka bisan an pira nga reaksyunaryo ha iya kalugaringon kampo ha kapaspason han iya pakigsabot ha imperyalismo nga US ngan ha pag-imbata hini nga manginlabot ha Pilipinas ha ngaran han “gera kontra ha terorismo”.

Waray-kaluoy an rekord han rehimen ha pagtalapas ha katungod pantawo. Tikang Enero 22, 2001 tubtob Hulyo yana nga tuig, nahirekord nga mayda na 37,164 biktima han pagsalbeyds ngan asasinasyon, masaker, pagsikmit ngan kawara, panmusil, pamomba, pangaresto ngan iba pa nga mga pagtalapas. Ginpupunting han rehimen bisan an mga dayag nga organisasyon sugad han Bayan Muna, nga nahiagum na han pagpataya han 22 nga lider hini. Mas grabe pa ngani kontra ha rekord han nauna nga rehimen nga Estrada an presente nga rekord han 86 nga kaso hin pagpatay ha 148 nga aktibista ngan gintatahapan nga simpatisador han BHB.

Gin-aantum nga dugang pa nga madako an ihap han mga pagtalapas ha katungod pantawo tungod han mga huyob han rehimen para ha todo-todo nga gera ngan gera han agresyon han US. Yana pala, nangangaro na an AFP ha Kongreso hin kadugangan nga 7,000 nga sundalo ngan 15,000 nga CAFGU. Ha Rehiyon 8, nagrerekluta na an 8<sup>th</sup> Infantry Division hin kadugangan nga 305 nga sundalo.

Ha iya SONA, gintugon ni Macapagal-Arroyo ha Kongreso ngan Senado an pag-apruba ha gilayon han balaud kontra ha “terorismo”. Katuyuanan hini nga himuon nga lehitimo an pagtagad nga “kriminal” ngan “terorista” ha mga rebolusyonaryo ngan pangontra han gubyrno. K a r u y a g hini nga pahaluagon an kahulugan kun hin-o an usa nga “terorista”

agud mahilakip an ngatanan nga mga nagsususon ha gubyrno, nga poyde umatubang ha pagbista ngan bug-os nga kinabuhi nga kapriso o pagbitay.



Gin-aantum nga magpapadayon an haluagan nga pandarahug ngan pamomoypoy tikang ha rehimen nga Macapagal-Arroyo. Ginduduso na yana ha Kongreso an pag-amyenda han reaksyunaryo nga konstitusyon agud himuon ini nga mas madarahug ngan maka-imperyalista. Samtang ginpapadig-on niya an basihan para han pasista nga paghahadi, urog nga ginpapakita ni Macapagal-Arroyo nga waray hiya interes nga ipadayon an ertestorya pankamurayawan giutan han gubyrno ngan NDF. Gin-aadman na han NDF an tibway nga pagserra ha ertestorya pankamurayawan tungod ha mga buladas han butangera nga hi Macapagal-Arroyo para ha dirudiretso nga gera.

### Rebolusyonaryo nga pagbabag-o an solusyon ha kakurian

Mas urog nga ginpapamatud-an ni Gloria Macapagal-Arroyo nga waray iba nga paglaum ha pagbabag-o kundi an nasudnon demokratiko nga rebolusyon. Ginduduso niya an katawhan ha gapil han rebolusyon tungod han desperado nira nga kamutangan ngan pag-araba nira hin solusyon. Labaw nga nagdadamo an ihap han andam umapi ha BHB ngan kumatin hin armas ha armado nga pakig-away. Mas nga nasulong an mga pakig-away han masa para sukton ngan papagbaydon an pasista ngan niyutiyo nga rehimen. Diri mag-iha hi Macapagal-Arroyo lahos han pasensya han katawhan. ▲

## “Gerra kontra ha terorismo”: Gerra kontra ha katawhan ngan rebolusyon Pilipino

**N**AGPAPAABAT HIN KAANDAMAN an rehimen nga Macapagal- Arroyo ngan imperyalismo nga US

para ha magkabakyang nga opensiba kontra ha rebolusyonaryo nga kagiusan ngan katawhan Pilipino. Magkasunod nga gindeklara hadin Agosto han niyutiyo nga rehimen ngan han gubyrno nga Bush han US an “todo-todo nga

gerra” ngan mga pitad kontra ha PKP ngan BHB komo mga “terorista nga organisasyon”. Gindeklara han US an PKP ngan BHB komo mga “langyaw nga terorista nga organisasyon” nga gin-abuyunan liwat han gubyrno han Pilipinas. Tuyo han sugad nga pitad nga tagan rason an tikagrabe nga pasismo han niyutiyo nga rehimen ngan an direkta nga pangginginlabot han US ha usa nga gerra hin agresyon ha Pilipinas.



### Bag-o nga balitang han armado nga pangginginlabot han US

Naghahawan han dalan an niyutiyo nga rehimen para ha usa nga gerra hin agresyon han US pinaagi hin usa na liwat nga bag-o nga kasarabutan para ha “waray taning nga kooperasyon militar” giutan han US ngan Pilipinas. Hul-os nga tutuyangan hini an waray-katapusan nga serye hin mga Balikatan ngan panmaihaan nga pagbase han mga langyaw nga tropa. Pinaagi hini nga mga taglima katuig nga programa, magbabag-o hin itsura an Balikatan 02-1 ngadto ha usa nga “sustenido nga programa hin kooperasyon panseguridad ngan kontra-terorismo nga pagpapahiara ngan pagbuligay.” Amo ini an ginpadig-on pareho han gubyrno han Pilipinas ngan US dida han miting han Lupon ha Mutwal nga Depensa (MDB) hadton Hunyo 25 ha Hawaii, USA.

Katuyuanan han programa han MDB nga himuon nga lehitimo an permanente nga presensya han mga tropa nga Amerikano ha

nasud nga ginpapagawas komo waray-katapusan nga serye hin mga kulaos ehersisyo panggerra la. Dugang pa, naghahagudalan an programa ha hul-os nga pangginginlabot han mga langyaw nga tropa, tungod kay hihimuon nga nasudnon an lupgop han ira “treyning” ngan poyde hira idisponer diin man nga dapit ha Luzon, Visayas ngan Mindanao. Labot pa ha mga tropa han US nga aktwal nga napartisipar ha regular nga Balikatan, tutuyangan liwat an iba pa nga mga tropa ngan sarakyan panggera han US nga makasakob-gawas han nasud ha ngaran han “kontra-terorismo”.

Maghahatag liwat an US hin \$25 milyon para ha “kampanya kontra ha terorismo”. Kadugangan ini ha \$10 milyon an balor nga higamit ngan serbisyo militar nga nauna na nga iginhatag komo kaparte han Mutwal nga Kasarabutan ha Lohistika ngan Suplay (MLSA). Nauna na nga nakaghatag an US hin \$100 milyon nga ayuda militar ha AFP ha naglabay nga tuig.

...tikang ha paypay 8

### Pagdisponer hin mga “eksperto ha kontra-gerilya nga pakiggerra”

Ilarum han bag-o nga kasarabutan, maabot ha Oktubre an diri pa tukib nga ihap hin mga “eksperto ha kontra-gerilya nga pakiggerra” tikang ha US para magpahira hin mga yunit han iba-iba nga sanga han AFP. Ididispone an nasabi nga mga tropa ha bug-os nga nasud komo mga “instruktor” han AFP, kaiba ha Balikatan 02-1 nga naglimita ha papel han mga tropa nga US komo mga “tagasagdon” la ha sakob han mas haligot nga lugop (Zamboanga ngan Basilan ha Mindanao). Parupareho ini han pagsakob han mga Special Forces han US ha Byetnam hadton 1962 para kulaos magtreyning la han niyutiyo nga hukbo kundi sumingadto ha gerra hin agresyon.

Tungod han sugad hini nga bag-o nga oryentasyon ha Balikatan, tetreynigon han mga sundalo nga Amerikano an Light Reaction Company (pinili nga yunit pankombat) han Army ha Fort Magsaysay ha Nueva Ecija. Ha Visayas, papahiraan an mga piloto han Air Force ha Mactan Air Base ha Cebu. Ha Mindanao, papahiraan an mga batalyon nga nakabase ha Camp Malagutay ha syudad han Zamboanga.

### Paborable nga kundisyon ha pagsulong han gerra han katawhan

Mapapakyas an nahihimulag ngan maruya nga rehimen Macapagal-Arroyo ha pagtirok hin suporta para ha kontra-rebolusyonaryo nga gerra hini ngan ha hulga han gerra hin agresyon han US. Waray tuhay nga tawo nga mabulig ha panlulugos ha iya kalugaringon nasud. Lugod, dugang nga magdadagaang an makanasud ngan anti-imperyalista nga diwa han katawhan ha atubangan han pasista ngan imperyalista nga pangangatake.

Mas urog nga magigin dunot ngan mapipi pang an pasista nga rehimen ngan

imperyalismo nga US kun ig-insister nira an gerra ha luyo han grabe nga krisis sosyo-ekonomiko ha Pilipinas ngan bug-os nga kalibutan. Bisan ha kalugaringon ranggo, may pira nga reaksyunaryo nga diri andam sumuporta kan Macapagal-Arroyo ngan ha armado nga pangiginlabot han US. Diri liwat makakaya han rehimen ngan han imperyalismo nga US an panmaihaan nga gerra han katawhan. Segurado nga ha dalagan han panahon, hinay-hinay hira nga magluluya samtang papitad-pitad naman nga makakatirok hin kusog an rebolusyonaryo nga kagiusan.

Grabe nga disbentahe para ha mga tropa nga US ngan AFP an tagdagko nga dispusisyon han mga pwersa para lugupon an bug-os nga nasud, usa nga butang nga waray pa utro himua han US tikang han mapardi ini ha Byetnam hadton 1975. Bulnerable an mga tropa nga US ngan magin an mga empresa nga US ha mga taktikal nga opensiba han hukbong bayan.

Aanohon la han imperyalismo nga US ngan pasista nga niyutiyo hini an buhawi han gerra han katawhan. Labaw nga magigin makatadungan ha mata han katawhan ngan bug-os nga kalibutan an armado nga rebolusyon para ha nasudnon nga katalwasan. Diri matugot an katawhan han kalibutan nga tamas-tamason han imperyalismo nga US ngan pasista nga niyutiyo nga rehimen hini an nasudnon nga integridad ngan paglulugaring han Pilipinas. ▲



LITERATURA NGAN ARTE  
Usa nga kanta

GLORIA HAMBUGERA!

(ha tono han kanta nga “Gloria Labandera”)  
ni Kasamang Konik

**Koro:**  
Gloria, Gloria hambugera! (3x)  
Hambugera hi Gloria!

**I**  
Ayaw pagruhaduha pamati han am kanta  
Hiunong han Balikatan ni Gloria ngan Uncle Sam  
Pagpapahiara kuno han pwera armada  
Pagkontra han mga terorista.

**II.**  
Tumong hini nga kampanya nga ira malipol  
An mga Abu Sayyaf nga kilala nga bandido  
Pero ha panmaihaan siring pa ni Hen. Reyes  
Pagtudas hinin rebolusyon.

**Koro:**  
Gloria, Gloria terorista! (3x)  
Terorista hi Gloria!

**III.**  
Waray ligal nga basehan inin Balikatan  
Lugod panguwat ngan pagtamak han aton  
integridad  
Simple nga ladawan pagka-bagakolonya  
Nasud ta ha imperyalista.

**IV.**  
An dako nga tumuyo paglansar hinin gerra  
Interes ha ekonomya ngan pulitika  
Para mapaibsan krisis ha Amerika  
Ha nasud ta ira ginpapasa.

**Koro:**  
Gloria tuta han Amerika! (3x)  
Niyutiyo hi Gloria!



**V.**  
Iya ginpanaad daw bura nga nawara  
Serbisyo, tuna ngan trabaho ngadto ha masa  
Baton han kakurian ngan ha kakablasan ta  
Helikopter, tanke ngan bala.

**VI.**  
Hiluag nga katawhan andam na ha pagkontra  
Estratehiko nga interes han imperyalista  
Rehimen ni Gloria aton na ibabagsak  
Kay pakuri ini ha masa.

**Koro:**  
Gloria, Gloria hambugera!  
Gloria, Gloria terorista!  
Gloria tuta han Amerika!  
Ibagsak ta hi Gloria!  
(Otruhon duha kabeses)